

فريق التفريغ بموقع الطريق إلى الله

يقدم

من سلسلة "عرض الملك"

عرض صلاة الفجر

لفضيلة الشيخ: أحمد جلال

رابط المادة: <http://way2allah.com/khotab-item-113481.htm>



اليوم بإذن الله سبحانه وتعالى مع عرض جديد من عروض الملك، عرض اليوم متعلق بصلاة الفجر اللي للأسف أهملها كثير من الناس أو نقول بعض الناس، صلاة الفجر من الصلوات اللي ربنا -عز وجل- جعل لها أجر عظيم جدًا، ووضع لها عروض كثير جدًا جدًا جدًا.

هنحاول مع بعض كده نقف مع هذه العروض عرض عرض، وأقول لكم بقى معقول بعد العرض ده ممكن حد بعد كده بعد رمضان يضيع صلاة الفجر؟! تعالوا مع بعض ناخذ هذه العروض عرض وراء الثاني:

العرض الأول: نور على الصراط

أول عرض من عروض ربنا -سبحانه وتعالى- فيه مرحلة خطر جدًا من مراحل القيامة، المرحلة الخطر دي لا نجاة منها إلا بالنور العظيم: مرحلة الصراط

مرحلة الصراط لما ينضرب الصراط على جهنم، السيدة عائشة بتسأل النبي صلى الله عليه وسلم بتقول له: يا رسول الله: "أين يكون الناس يوم تبدل الأرض غير الأرض والسموات" فقال يا عائشة: "هم في الظلمة دون الجسر" صحيح مسلم، على الظلام الشديد أوي اللي قبل الصراط، الظلمة دي عشان أقدر أعدي أنا محتاج نور.

في مرة كنت مسافر القاهرة وكان يومها كمية المطر كانت غير طبيعية، سبحان الله كهربة العربية فصلت أيام ماكان النور بيقطع كثير والنور في المسافة دي تقريبًا من أول الخروج كده من الدائري لحد بنها الكهربي كانت قاطعة، تخيل النور قاطع تمامًا والدنيا بتشتي ويتمطر والنور عندي في العربية كمان فصل، أنتم لا تتخيلوا قدر الوحشة والخوف اللي كان الواحد يعني عايشه في الوقت ده، ومطبات فجأة والدنيا ضلمة وسبحان الله عرفت قدر النور.

يوم القيامة بقى لما بيضرب الصراط على ظهري جهنم، ضلمة ضلمة لن ينجو أحد في هذا اليوم إلا بالنور، وأعظم نور ربنا سبحانه وتعالى ممكن يديهولك وانت بتعدي اليوم ده هو النور اللي انت تاخذه بإذن الله بسبب صلاة الفجر.

أول عرض من ربنا خذوا نور، قال النبي صلى الله عليه وسلم: "بشر المشائين في الظلم إلى المساجد بالنور التام يوم القيامة" صححه الألباني

يبقى أعظم نور وأقوى نور وأجل نور ياخذه العبد ياخذه من صلاة العشاء وصلاة الفجر، أدي العرض الأول.

العرض الثاني: النجاة من النار

العرض الثاني: أكبر مصيبة وأكبر خطر من الممكن يتعرض لهم العبد يوم القيامة إن والعياذ بالله رجله تهوي إلى النار، إحنا محتاجين بالفعل يكون عندنا حاجة تأمنا من نار الآخرة، **ولن تجد شيء أبدًا يؤمنك من نار الآخرة زي صلاة الفجر وصلاة العصر**، ولذا قال لنا النبي صلى الله عليه وسلم على سبيل الجزم: **"لن يلج النار أحدٌ قبلَ طُلُوعِ الشمسِ وقبلَ غروبِها"** صحيح مسلم

لن يلج، محدش هيخش النار أبدًا طالما هو محافظ على صلاة الفجر ومحافظ على صلاة العصر، طيب اشمعني الفجر والعصر؟

أصل الفجر الناس كلها قايمة تعبانة ومكسلة ومش قادرة تقوم، وأما العصر فمعظم الناس بتبقى في أعمالها ودينيتها، فاللي يفضل ربنا على دينته، واللي يفضل ربنا -عز وجل على نفسه ده ماينفعش أبدًا يخش النار، اللي قدر يهذب نفسه ويربي نفسه ويؤدب نفسه إن صلاة الفجر دي أساس وصلاة العصر أساس أيًا كان عملي وحالي وتعبي لازم أشد حيلي في صلاة الفجر، **اللي قدر يروض نفسه على صلاة الفجر وصلاة العصر لا يلج النار أبدًا**.

العرض الثالث: رؤية وجه الله الكريم

العرض الثالث: أعظم نعمة وأعظم نعيم لأهل الجنة في الجنة هو رؤية الله -سبحانه وتعالى-؛ طيب ممكن حد يقول لي لو أنا عايز أشوف ربنا أعمل إيه؟ اللي عاوز يشوف ربنا يوم القيامة لازم يدفع، سلسلة عرض الملك من أول يوم لآخر يوم بتكلم عن التجارة مع الله، تاجر مع ربنا، عايز تكسب من التجارة دي إنك تشوف ربنا يوم القيامة خلاص ادفع، أدفع إيه؟

قال النبي صلى الله عليه وسلم كما في حديث جرير: **"إنكم سترون ربكم كما ترون هذا القمر"** -وأشار إلى القمر بالسَّابَةِ- **لا تضامونَ في رؤيته"** صحيح مسلم

زي ما بتشوفوا القمر كده في ليلة التمام ليلة ١٤ أو ليلة ١٥ انتو برده هتشوفوا ربنا -سبحانه وتعالى- يا رب اجعلنا منهم يارب شوف النبي يقول لك إيه؟

"فإن استطعتم أن لا تُغلبوا على صلاةٍ قبلَ طُلُوعِ الشَّمْسِ وقبلَ غروبِها فافعلوا" صحيح البخاري
حافظوا على صلاة الفجر وصلاة العصر تكون النتيجة تشوفوا ربنا سبحانه وتعالى يوم القيامة.

العرض الرابع: تجمع الملائكة عندك

العرض الرابع: أكثر حاجة ترفع من قدرك ومن شأنك عند ربنا برده محافظتك على صلاة الفجر وصلاة العصر، شوف النبي صلى الله عليه وسلم يقولنا إيه: **"يتعاقبون فيكم ملائكة بالليل وملائكة بالنهار، ويجتمعون في صلاة العصر وصلاة الفجر"** صحيح البخاري، فيه نبطشيات من الملائكة: نبطشية بتنزل وقت صلاة الفجر وتطلع وقت صلاة العصر، ونباطشية بتنزل في العصر وتطلع في الفجر،

يبتناوبوا علينا وده زي ما قتللكم هو العرض اليومي لعملك على الله لأن أنا قبل كده قلت لكم عروض الأعمال إلى الله كثير فمنها إن أعمالك تُعرض يوميًا في الفجر والعصر، ومنها إن هي تُعرض أسبوعيًا إثنين وخميس، ومنها إنها تُعرض سنويًا في شهر شعبان، وعرض الأعمال كله يوم العرض على الله، فالعرض اليومي اللي أعمالك كلها بتتعرض على ربنا - سبحانه وتعالى - بتتعرض في صلاة الفجر وصلاة العصر.

فالنبي يقول لنا إيه، "يتعاقبون فيكم ملائكة بالليل وملائكة بالنهار، ويجتمعون في صلاة العصر وصلاة الفجر ثم يعرج الذين باتوا فيكم" اللي هما نزلوا العصر وقعدوا معنا لحد الفجر "فيسألهم وهو أعلم بهم كيف تركتكم عبادي؟ فيقولون: تركناهم وهم يصلون، وأتيناهم وهم يصلون" صحيح البخاري

لحد هنا خلاص معادش فيه سؤال، ربنا مش هيسأل عن حالك، إنت جيت جت الملائكة شافتك في صلاة العصر في المسجد، في صلاة الفجر في المسجد.

هي دي رفعة القدر، إن ربنا سبحانه وتعالى يقول لأ خلاص سيبوا العبد ده مش عايز أسأل عن عمله، كفاية إن العبد ده بدأ اليوم بتاعه بالصلاة وانتهى بالصلاة.

العرض الخامس: دخول الجنة

ولذا قال النبي صلى الله عليه وسلم إن اللي يعمل ده ليس له عند الله إلا الجنة كما قال صلى الله عليه: "مَنْ صَلَّى الْبَرْدَيْنِ دَخَلَ الْجَنَّةَ" صحيح البخاري، البردين هما الفجر والعصر، ارتباط الفجر والعصر ارتباط وثيق جدًا، الصلاتين دول مهمين جدًا في حياة الإنسان، سبحان الله!

العرض السادس: شهود الملائكة للصلاة

ومش كده وبس، عرض جديد من عروض ربنا في صلاة الفجر بالذات، ربنا يقول لنا: "وَقُرْآنَ الْفَجْرِ إِنَّ قُرْآنَ الْفَجْرِ كَانَ مَشْهُودًا" الإسراء: ٧٨

أي تشهده الملائكة، وقرآن الفجر مش اللي هو قبل الأذان زي ما بعض الناس بيظن، لأ قرآن الفجر هو قرآن الصلاة، وقت تنزل الملائكة على العباد عشان كده سبحانه الله تجد أكثر صلاة فيها سكينة وطمأنينة حتى النفس اللي إنت بتشمه بعد صلاة الفجر، تحس سبحانه الله بالسكينة في صلاة الفجر، وتحس براحة البال وطمأنينة الصدر وقت صلاة الفجر، شم النفس بتاع صلاة الفجر وشم النفس بتاع صلاة الظهر والعصر تعرف الفرق.. عارف ليه؟ "وَقُرْآنَ الْفَجْرِ إِنَّ قُرْآنَ الْفَجْرِ كَانَ مَشْهُودًا" فيه ملائكة في الأرض مالية الدنيا عشان تشهد تلك الصلاة.

العرض السابع: تكون في ذمة الله

مش كده وبس، بصوا كلنا في حياتنا مُعْرَضِينَ لأزمات ومشاكل، صح؟ بس سبحانه الله تلاقي دايماً الإنسان الحريص أوي على صلاة الفجر ده حاجة خاصة شوية، ليه؟! أصل دي زمة ربنا.

قال النبي صلى الله عليه وسلم: "من صلى الصبح فهو في ذمة الله" صحيح مسلم، ربنا يحميه ويسدده من كل مكروه، من كل ضرر، وكل شيء ممكن يؤثر على دينه أو على دينته تلاقي ربنا سبحانه وتعالى ببصرها عنه.

العرض الثامن: كأنه قام الليل كله

مش كده ويس، عرض جديد على صلاة الفجر، سبحان الله! أسألکم سؤال؟ لو واحد بعد ما خلصنا صلاة العشاء وطلع بره في النادي وقاعد ماسك مصحفه يقرأ القرآن وفضل واقف على رجله من الساعة ٨:٣٠ ودخل هنا الساعة ثلاثة إلا ربع، في ظنكم ممكن ياخذ أجر أد إيه عند ربنا -عز وجل-؟
أظن أجر عظيم أوي صح؟ طب تخيلوا إن الأجر ده كله ممكن تاخده في صلاة الفجر بس! شوف واحد قاعد من بعد صلاة العشاء راکع ساجد باكي بين يدي الله -عز وجل- تالي لكتاب الله لحد الفجر وبعد كده اللي يصلي صلاة الفجر ياخذ أجر هذا الإنسان، قال صلى الله عليه وسلم:
"من صلى العشاء في جماعة فكأنما قام نصف الليل. ومن صلى الصبح في جماعة فكأنما صلى الليل كله" صحيح مسلم.

العرض التاسع: أمان من ثلاث حاجات

صلاة الفجر تديك أمان من ثلاث حاجات، نختم بيهم:

١- أمان من النفاق

عاوز تقيس إيمانك، أو فيك شعبة من شعب النفاق ولا لأ-ربنا يجنبنا وإياكم مثل هذه النفاق يارب- عايز توزن إيمانك انت إيمانك عالي ولا فيه مشكلة اوزن نفسك بصلاة الفجر، ده الميزان الحقيقي للمؤمن، لذا قال صلى الله عليه وسلم: " ليس صلاة أثقل على المنافقين من الفجر والعشاء " صحيح البخاري
دي أثقل صلاة على المنافقين، طيب والمؤمن؟ ده هو ما شاء الله سباق لصلاة العشاء وصلاة الفجر.

٢- أمان والعياذ بالله من عذاب القبر

النبي صلى الله عليه وسلم يقول لنا أنه رأى فيما يرى النائم رجل مضطجع على قفاه، نايم على ظهره وعلى رأسه رجل معه حجر يضربه على رأسه فينفلق الرأس ويبتدعهده الحجر فيذهب فيأتي بالحجر فتلتئم الرأس، يضربه تاني الرأس تنفلق نصفين وهكذا حاله قبل قيام الساعة فقال النبي صلى الله عليه وسلم هذا هو رجل أتاه الله القرآن فهو ينام عن المكتوبة:

"أما الذي يُشَلِّعُ رَأْسَهُ بِالْحَجَرِ، فَإِنَّهُ يَأْخُذُ الْقُرْآنَ فَيَرْفُضُهُ وَيَنَامُ عَنِ الصَّلَاةِ الْمَكْتُوبَةِ " صحيح البخاري
يعني صلاة الفجر.

ده واحد ربنا اداه القرآن فبدل ما هو يقرأ بالليل وبعد كده يصلي الفجر، لأ ده نام عن القرآن ونام عن صلاة الفجر فشوف سبحان الله ده عقوبته في قبره، فصلاة الفجر أمان من عذاب القبر.

٣- أمان من تسلط الشيطان عليك

صلاة الفجر أمان من تسلط الشيطان عليك، "ذُكِرَ عِنْدَ النَّبِيِّ صَلَّى اللَّهُ عَلَيْهِ وَسَلَّمَ رَجُلٌ نَامَ لَيْلَةً حَتَّى أَصْبَحَ " صحيح البخاري

تخليلواكم الموظفين اللي ده حالهم، حتى سبحان الله أول ما تروح عند حد من الموظفين الصبح عشان تخلص ورقة أول ما تشوف وشه! استر يا رب! أصله قبل ما ينام ظبط المنبه على سبعة ونص على ما يقوم بسرعة يغسل وشه ويلبس ويجري عشان يلحق الميكروباص ظبط المنبه على سبعة وماظبطهوش على صلاة الفجر! شوف النبي يقول لنا إيه

"ذُكِرَ عِنْدَ النَّبِيِّ صَلَّى اللَّهُ عَلَيْهِ وَسَلَّمَ رَجُلٌ نَامَ لَيْلَةً حَتَّى أَصْبَحَ، قَالَ: ذَاكَ رَجُلٌ بَالِ الشَّيْطَانُ فِي أَذُنَيْهِ، أَوْ قَالَ فِي أُذُنٍ " صحيح البخاري

قال الحافظ بن حجر -رحمة الله عليه-: "وهذا الأمر على الحقيقة، الشيطان استخفَّ به لدرجة أن اتخذه كنيِّفًا"، وفريق قليل جدًا من العلماء قال: "بال الشيطان في أذنه كناية عن الوسوس التي يلقيها الشيطان في الودن". لكن الأمر في الحقيقة عند جماهير العلماء، وسبحان الله لما الشيطان يسيطر عليه بهذه الصورة للدرجة دي تلاقيه قايم الصبح خبيث النفس كسلان وجسمه مكسر ومهدود وهمدان. وييجي يسأل هو إيه اللي بيحصل؟

اللي بيحصل باختصار في الحديث اللي نختم بيه درسنا قال صلى الله عليه وسلم: "يَعْقِدُ الشَّيْطَانُ عَلَى قَافِيَةِ رَأْسِ أَحَدِكُمْ ثَلَاثَ عُقَدٍ إِذَا نَامَ. بِكُلِّ عُقْدَةٍ يَضْرِبُ عَلَيْكَ لِيًّا طَوِيلًا. فَإِذَا اسْتَيْقَظَ فَذَكَرَ اللَّهَ، انْحَلَّتْ عُقْدَةٌ. وَإِذَا تَوَضَّأَ، انْحَلَّتْ عَنْهُ عُقْدَتَانِ. فَإِذَا صَلَّى انْحَلَّتِ الْعُقَدُ. فَأَصْبَحَ نَشِيطًا طَيِّبَ النَّفْسِ وَإِلَّا أَصْبَحَ خَبِيثَ النَّفْسِ كَسْلَانًا" صحيح مسلم

خلاص ما هو الشيطان مش مسيطر عليه طيب لو صاحبنا ماعملش كده هو قايم بعقد تلاقي بقى ضهره مدغدغ ومش قادر مكسر ومزاجه مش حلو وييجي حد يكلمه روحه في مناخيره ومش طايق حد، السبب هو صلاة الفجر. طيب النفس ونشاط الجسد في صلاة الفجر.

خطر ترك صلاة الفجر

إنما النهارده اللي يضيعها يقع في خطر والعياذ بالله في شعبة من الثلاثة: خطر النفاق، عذاب القبر، تسلط الشيطان عليه. صلاة الفجر، العصر، العشاء ثلاث صلوات أساسية في حياة المسلم، وبينهم طبعًا صلاة الظهر والمغرب، طبعًا من الصلوات المهمة جدًا ويبقى فيه بعد رمضان إن شاء الله إن ربنا أحيانًا كلام بقى عن هذه الصلوات وفضلها.

جزاكم الله خيرًا صلى الله وسلم على نبينا محمد وعلى آله وصحبه وسلم.

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>